



Տ. ՏԱՐՕՆ ԵՊԻՍԿՈՊՈՍ ՃԵՐԷՃԵԱՆ

(11.07.1937–5.12.2023)

Դեկտեմբերի 5-ին, կեանքի 86-րդ տարում, Ֆրանսիայում, ի Տէր հանգաւ Հայաստանեայց Առաքելական Սուրբ Եկեղեցու նուիրեալ սպասաւոր, Մայր Աթոռ Սուրբ Էջմիածնի երիցագոյն միաբաններից Գերաշնորհ Տ. Տարօն եպիսկոպոս ձերէնեանը:

Ն. Ս. Օ. Տ. Տ. Գարեգին Երկրորդ Ամենայն Հայոց Կաթողիկոսն ու Մայր Աթոռ Սուրբ Էջմիածնի ողջ միաբանութիւնը սգում են հոգեւոյս Տ. Տարօն եպիսկոպոս ձերէնեանի մահը եւ աղօթում նրա հոգու հանգստութեան համար:

Յիշատակն արդարոյն օրհնութեամբ եղիցի:

Կենսագրութիւն

Գերաշնորհ Տ. Տարօն եպիսկոպոս ձերէնեանը (աւագանի անունը՝ Ժիրայր) ծնուել է 1937 թ. յուլիսի 11-ին՝ Բէյրութում: Նախնական կրթութիւնը ստացել է Սահակեան վարժարանում:

1952 թ. ընդունուել է Մեծի Տանն Կիլիկիոյ Դպրեւանք:

1957 թ. ձեռնադրուել է սարկաւագ:

1959 թ. աւարտել է Մայր Աթոռի Ս. Էջմիածնի Գէորգեան հոգեւոր ճեմարանը:

1960–1963 թթ. ուսանել է Անգլիայում, նախ՝ Քելհամի Սուրբ Առաքելութիւն, ապա՝ Լոնդոնի Թագաւորական քոլեջում:

1963 թ. ձեռամբ հոգեւոյս Տ. Սերովբէ արքեպիսկոպոս Մանուկեանի ձեռնադրուել է աբեղայ:

1964 թ. նշանակուել է վալանսահայութեան հոգեւոր հովիւ:

1965 թ. ապրիլի 23-ին, պաշտպանելով վարդապետական ատենախօսութիւն «Եօթը Խորհուրդներ Հայոց Եկեղեցու» թէմայով, Օշականի Ս. Մեսրոպ Մաշտոց եկեղեցում՝ ձեռամբ Ն.Ս.Օ.Տ.Տ. Վազգէն Ա. Ամենայն Հայոց Կաթողիկոսի ստացել է վարդապետական մասնաւոր աստիճան:

1965 թ. վերադարձել է Ֆրանսիա եւ ծառայութեան կոչուել Մարսելում: Այնուհետեւ երջանկայիշատակ Վազգէն Ա. Կաթողիկոսի կարգադրութեամբ մեկնել է Դամասկոս՝ որպէս առաջնորդական տեղապահ:

1972 թ. նշանակուել է Նիսի շրջակայքի հոգեւոր հովիւ:

1978 թ. ձեռամբ Գերաշնորհ Տ. Շահէ արքեպիսկոպոս Աճեմեանի՝ ստացել է ծայրագոյն վարդապետութեան աստիճան՝ ներկայացնելով իր «80 քարոզներ» աշխատանքը:

1991 թ. ընտրուել է Մարսելի առաջնորդական փոխանորդ եւ հայրապետական պատուիրակի փոխանորդ:

1992 թ. ստացել է եպիսկոպոսական օծում՝ ձեռամբ երջանկայիշատակ Վազգէն Ա. Կաթողիկոսի:

2003 թ. օգոստոսին, ձեռնադրութեան 40 ամեակի առթիւ, Ամենայն Հայոց Գարեգին Բ. Հայրապետը նրան արժանացրել է Հայ Առաքելական Եկեղեցու «Ս. Ներսէս Շնորհալի» շքանշանին:

2003 թ. իր իսկ ցանկութեամբ Սրբազան Հայրն անցել է վաստակեալ հանգստի:

